

四庫全書

集部

欽定四庫全書

弇州續稿卷一百九十五

明 王世貞 撰

文部

書牘

王脣昌

下走負跡弛之性乏鄉曲之譽既不能曲意以事諸言  
路貴人又不能早自引退以來茲憎口執政見憐不禡

其服俾存一綫需次鄉井為願滿矣為分足矣海內士大夫即不以媚白簡而無下石則有之未有能見惜者也即見惜者有之未有能排狂瀾樹赤幟為下走一鳴不平者也毋論他人不能即下走亦不能也何者搏飯既窺明潔非易與嫂並處表介寔難且令下流之士曉曉自洗人不寘之不聽則以為不自量作復出地而已誠不意廟廊之上持天下萬世是非之柄如執事者而為我致辨也執事之文天下萬世誦之執事所持是非

之柄天下萬世信之凡下走所欲言者執事已言之而  
又何足寘筆舌也雖然執事知己也知己而不為盡誰  
當盡者且事本末未易明也下走硜硜一介之操亦未  
易述也當嚴氏炙手時其意亦以為僕足羅者蓋數近  
而數遠之終不能羅我而會故人楊仲芳當論報密使  
人告急且有托孤之語是時家君方躑躅邊寄念欲顯  
救之則不敢陰為之則不能而座主王太常稱嚴氏客  
亟往與謀因為隱以諷之而不見聽尋仲芳受禍之次

日隻鷄斗酒飲泣致奠稍損素裝津遣孱弱嚴氏後微聞之意不樂然僅令銓曹勿與司鐸而已至大計吏尚未議逐也又二年而先君以疆場之議見讒又二年而先君以疆場之事見禍此為下走激也者抑非激也激則下走尚不能稱人何論一官哉奉諱之際搏踊絕食自分必死偶不死耳歸侍老母撫弱弟以處苦塊至於禪服不如葷不入內不踰喪幕此鄉黨三尺童子所知者當是時自謂戴盆何以望天故雖公除之後葛巾布

袍苴履陶器自弔喪問疾之外不敢預一切慶賀禮不敢領公府尺帛不敢與宴會何況音樂晨起輒讀佛書以果歸因用空減現稍足自支至於養生之書亦絕不置覽明非本趣也磊塊之極不能不付之酒取其沉憯毋所知覺而已款宵牛飲當自有人第非下走耳下走之廢棄者十年然國家之所僇辱嚴氏既稍足當而先君用伏闕之章見雪復還故官得從改葬奈何責下走以讐國也下走固不敢為矯矯然自弱冠登朝絕不覩

狎邪面家守先訓大小千指無一曉音律者年近三十  
無子先君為置二媵連舉三子其媵一死一存存者亦  
且老矣唯生平好諸書名畫古墳典之類即廢箸鬻衣  
有所不顧近置一圃頗有泉石臺榭花竹之類足以區  
遣餘日即使其人舉以督過下走不能從也夫人各行  
見而已其所以毛摘下走則非其責下走以出處則何  
敢盡廢下走豈嚇腐鼠戀戀一官者徃時所以不能堅  
鑿坏之節有二其一天子雪先君而後用下走且一時

公卿故人所從吏誼不敢已諾而自遂其二則欲有所  
效於先君未已也然令下走服官僕僕刀筆於朝事民  
瘼小見寸補則猶可勉而就寢食不然而令之佩玉衣  
錦夷猶夏旃之表鳴騶坐輿偃蹇吏民之上人雖不言  
能不內媿於志乎虞仲翔有云死以青蠅為弔客即一  
人知我者不恨今有執事一人在夫復何言自今而往  
已矣靡所不杜口矣舍弟行聊此附聞并往拙刻請正  
緣方剛易未為成書秋末當別上一部也清朝簪筆映



照遠邇加食自愛倘因北風復惠德音

又

丁丑夏拜公手教及所為僕辨誣書至秋中而家弟有齋捧役謹附報啟一通并拙集上之歸詰所往則云公賜沐歸信陽矣其書與集留之趙定宇太史竟不知其為洪喬浮沉否也貞不能自固匹夫之節強出供人齒牙需次里居一丘一壑遊戲子墨之林足以老矣無端為尺一所驅懇辭之疏至公車而被阻方在躑躅間二

白簡復見訖矣雖慈母如公能亦無三至之疑乎第貞  
所愧跡者一出所愧心者園池飲食圖籍之類耳此外  
不敢有毫髮負橫山烈婦錄始得見全文公一片惻怛  
慷慨心乃爾弟令僕視此婦却不免汗顏也學圃薏蘇  
舊得抄本於確山令頗有魚豕之誤今刻本甚佳且有  
玄晏之序帝為貴矣梅竹二古蹟清絕楚楚九友齋增  
歲寒之益休汝諸客得無少寂寥乎有梅谷一卷吾吳  
前輩名筆也不足以酌來雅聊見縞素之重耳見諭得

拙集若是近歲增校者不敢再上有新刻二種附覽辱  
委喬峰亭記欲留去人五日而授之渠不能待當更覓  
便專納也木天之地待公氣色太夫人不可以板輿侍  
乎幸疾其驅以慰物情不一

又

貞業以擲身方外七尺團焦作夜郎王國青雲故人不  
能在臆獨我公大雅醉心之久間一二怍怍憧憧而里  
人金生歸稱與公比鄰得數奉教云公且用使事於春

仲渡江訪僊跡因而過我無何曾將軍至其言亦合審  
爾則雲窩蒼苔甘心破長者轍矣老僧縱得半月忙無  
不可將軍鬢髮渥顏猶能開五石弧雖舌底蓮花縱橫  
而語及經世鼻息拂然不能無動意第才大非世人所  
能用也僕生平不曉談兵雕蟲之技乃是多生業障填  
人齒牙未滿今方掩耳之不暇而將軍必欲飾蛾眉於  
混沌使之倚門可咲亦可畏也將軍誠感公重公高誼  
薄雲天厚德聞宇宙幸解我二人縛放之清冷豈不快

哉時事轉眼倏忽萬變不知者以為變知者以為常耳  
計當不滿大智識一笑也獻歲加餐自愛

又

貞自鑿坏來弇山石久不沾異人跡而明公儼然臨  
之音徽恬雅清暢真秋月春風草木所被藹然生色惜  
迴風雲旗言別恍忽不能少留日夕耳得教知以水澁  
改陸車馬風塵不無跋履之苦抵家侍太夫人寢膳當  
自調適第時事頗佳不宜濡遲命駕以渴館閣諸公之

臆損貺諸刻具諗大雅文字故不凡獨未拜二姑山記  
梓耳如貞嚮草喬峰亭記凋鏤鎖屑久而更愧之何足  
廁公亭壁別帟見諭捧誦不勝酸鼻以公風木之思若  
彼肺腑之愛若此即貞雖不文敢不勉強握觚翰以從  
事第入春夏善病病得之思慮多擬於來歲初一日焚  
筆研殘冬先謝竿尺若公具行實以秋冬間附來當一  
一如命慎勿顛介布幣也曾將軍能不出否必出無為  
倒屣者且或有意外幸止之秋風漸涼為道自愛

又

屈指與公把袂時恰周歲矣臘盡而使者果至以手教  
大幣介令先公之狀來何孝誠篤懇若是也司馬子長  
於李將軍蓋慨然深悲其不遇矣故於所著傳描寫委  
曲殆盡千載之下猶使人立髮酸鼻僕之托契門下寧  
後少卿先明威之視李將軍奇數則過之矣雖李將軍  
有陰禍而先明威世世有陰德宜其子孫之顯阨相遼  
迥也鄙文不能當子長萬一公試讀之或亦能令逝者

不骨耳弟自別公即善病病至八月而解委頓一榻栩  
栩如蝴蝶今則頑健勝故矣獨苦身意俱不能淨筆研  
之役僕僕無遑時不獲已誓之佛前新歲從斷絕耳鄧  
先生大乘法器也公所贈詩相結為世外緣固善弟東  
方曼倩不陸沈金馬耶僕於和韻非所能辱見命不敢  
不勉為之殊愧形穢又憶得昨有諸子篇併書一扇頭  
附覽區區此念欲於名根力鏟削然一札二百言終始  
不離名如何如何不滿猶龍公一詫也復陶拜嘉幣儀



却納并有經刻土布之類附遠意照入不次

又

兩月來見邸報有居憂信竊意已之朝矣而今乃未之朝也則日侍太夫人湯藥躬含飲附於棺者勿之有悔焉矣公真孝子哉僕荷公國士之知於先將軍有通家子弟誼竊欲持三寸管而效不朽之微勞於竹素顧其辭曼弱不成語方且愧之而使者以手教至過相挹謝若真可相藉而重者是益僕愧也區區之視太夫人與

先將軍等豈敢獨有所靳公之不忍破僕戒也則鮑子  
矣元馭宗伯方一切謝絕而於公所懇則似有許色僕  
當時時為從吏之必不至誤大事於其時竊亦欲托片  
言於絮酒之末而今則未能也廟廊訪舊猥及不肖蕭  
艾之微豈敢與國香並席以故力辭而守此丘壑然實  
不負庚辰初念耳乃公以先公未究之典為言則無所  
逃罪第所以為地下痛心者區區忠勲為權臣所抑屈  
向既白之幸而獲雪則亦可以藉手地下矣僕髮且種

種苟得所謂未究之典而亟歸則是以一出微恩也出而所可建白者為何所可稱塞者為何恩益深顏益醜位益高譴益重將何以藉手先師也旦夕惟有轉徙深僻蔬食水飲為容棺之墟以待耳近來料理拙文數年內所塗抹不下於舊大槩綺語障深不忍付之秦火無以應命先師傳板在荆老處亦模糊惟雲間新刻完好而案頭適已盡却後可覓寄也大貺祇領薄奠附之來使殊為不虔伏冀情亮

又

七月初有信至張助甫中丞因附咫尺之書侑以不腆  
不知無浮沉否遠辱使將手教兩帋中具塵冕之抱與  
棲壑岩之致令人爽然讀二記毋論其文辭鉅麗而已  
乃其感慨蓄育陶洗超脫而又不為弔詭此執林之根  
柢物好之針砭也所示館閣諸公借老丈為儀羽移書  
侶道有司勸駕而公益堅考槃遠追誓墓今世路清夷  
賢者彙進必使巢由奮庸固似違性若夔龍在野恐有

任其責者公似未得高枕而卧也聞木天之地不無吁  
咈君子為敵隱憂未淺以公長者稍為調停之亦可龍  
蛇卷舒故自易耳僕因師期轉賒汨沒七載茫未覩效  
邇始邁一異人所傳殊為易簡即此法治耳疾神於社  
公之酒多矣不敢自私聊以奉薦無礙上人從管登之  
結夏天池未久往之南海欲追樊師故事僕謂達磨既  
東來二祖不西往且入番之路蜀與涼而已海舶多遲  
羅占城去天竺殊杳然此師良為失計取其一念而已

登之跡遠公之西方而心子牟之魏闕公之不來是也  
隨其心淨佛土淨如何所教證種種何必染削經行然  
後糲芘芻哉盡十六應真并古銅缶陶盃皆清閼閣中  
品但僕一褐隨身虛長者之惠如何所謂有此異物必  
擇異人歸之可也秋深珍重珍重

又

昨公以出處深致見詢切謂公考槃之操甚堅乘軒之  
願甚薄而於大誼未甚當且今台垣三大老視公輩行

不為前坊館諸賢則瞠乎後矣而鼎貴至紆金紫下者亦銀緋即公出而以一青衫立龍尾侍臣之末即不出而使鉅材宿學高節正議之士卧箕而洗頰恐俱非夔龍之席之所安也今得教果然矣車既脂矣馬亦秣矣苟公以經世之蓄應世何官不可居以出世之學應世何官為我累滿盈之戒是猶龍公學問猶未是西竺古先生學問承念及先君子葬祭其䟽自兩臺使而成之宗伯但宗伯許為移銓曹議贈有成言矣而忽中變疑

亦貴鄉一二老阻之顧聖主之恩不為薄矣長夏有事  
先隴少露寵光便於傍鑿一容棺之穴下見逝者不至  
大媿足矣足矣公拳拳見詢喻君乃楚之常德人其傳  
甚的而証甚竒第令真氣一至自然為我周流如輪王  
七寶若後所云云未之敢信也渠曾云有病耳者久自  
獲聰公能誓不傳人後當密以相告亦不必問此君也  
北上之序俟小閒具草今則未暇也富貴兩字中人如  
膏肓愚侮人若牽傀儡何至今日公始恨之惜之乎強



食自愛餘不悉

又

每從邸報問吾丈除目不得不知文星之尚在角亢也  
使者冒毒暑水陸二千里至則其一病矣俾就肆便湯  
藥已而出櫝則大誨與諸刻種種具列令人心目一醒  
前後三記博雅絕倫老大之愛石雖與李贄皇牛竒章  
同而所以用其愛者異彼特以彊有力致之耳石如有  
靈其沾沾於老大當不啻勝二公也缺陷說勘破物理

三列傳尤見高誼以老大所不足者豈僕一卮語而見  
需若此年來甚苦雕蟲之技受役於人刺促無休息時  
弟義不容已不免拈筆草數百言既成而讀之都不知  
作何狀今錄稿上如不以覆瓿者當畫烏絲於蠟紙書  
小行致之燕邸也張陽和太史一入鳳池便優轉鑿坡  
不俟秩滿必以此例待老丈此語度不滿高明一喙然  
亦恒人之情耳僕受常德喻布衣訣誓不妄傳人昨祇  
為家弟病佛前懺罪書與之仍勒彼勿泄今為吾丈不

免又破戒矣萬勿輕泄為僕下地域種也至祝至祝兩  
芝杯拜貺與三兒逌酌薊門薏苡酒便是覩芝字餘不

一

又

獻歲以來婁從郎報知門下趨佐成均峻長坊局兼清  
武黃儒者之榮甚矣要之鳳皇池汪濊恩波終不足以  
溷箕潁一派清冷也貞自昨冬叨玷除目上書乞骸未  
蒙見亮當時朝野知故咸謂先君子拜地下之錫非常

若更偃蹇朝命以自為名非臣子之道弔勉一出悔吝  
百緒加以餓莩蒿目隱憂刺表病弟尚在邁軸殘荆宛  
轉牀第寢食之間無一是處以故於天上故人非不欲  
通咫尺之間而慙沮次且忽忽更若遺忘乃更承不鄙  
惠以德音中間字字肺腑言言金石貞何人斯而敢當  
此嚮誦大䟽草於鄙心甚合遲之十餘年而後得上既  
上而所亟行者景廟實錄而已建文之光復誠不易然  
終是萬古不可磨滅之論是䟽也始基之矣故當有知

音者張陽和宮諭未論出世與否要是大經世人曇首  
哀門之嗟威明絕鏐之痛豈惟一家一人之私也門下  
謂其嗽粥少而肌漸削未幾物故乃云近所感恙亦畧  
似之以為憂此君骨聳而太枯神短而多役是以不免  
門下氣清質厚心坦思裕故是句曲華山中也何憂  
之有向所傳喻君法雖於聞根未必效要足小康或公  
行之未合作耳二室諸記詩便是山史董狐從姑附庸  
既蒙胙土少室從盟復得狎主何幸如之僕老來始獲

一寓目三山二水小有題咏惜其晚合所謂不及檀郎  
年少時也非久當遂初服併以請教不一

又

世貞方請告杜門與客茅生者談茅生故嘗習老丈僕  
謂當今冲雅如黃叔度退讓如羊鉅平淵博如杜征南  
文采如陸平原者老丈一人而已茅生為咨嗟歎賞久  
之蓋質明而老丈之平頭以書至矣契合一何神也老  
丈書凡二通申契濶則悵河山之隔慊然不能奮飛叙

雅寄則動箕穎之思快然若披雲霧至於流悼亡弟載讀些言使人一字一淚也腸寸寸折矣亡弟器業粗就名聞粗章有佳子姓粗繼誠如老丈所禰但天地間無故失一善人捨此哀劣垂盡之兄而去之令存者何以度日區區違心而出尤悔萬狀且日受筆研債不休生趣盡矣以故懇上疏乞休第不知廟廊諸君子肯憐而放之否老丈書謂比來益與藥物親日嗽粥僅一器此外輔以少茶果頗與張官諭相類貞於三月前已得喻

竊謂不過偶然食飲小失宜爾且老丈精神淵著何物  
宮諭可比今得教尚未平而詢之來人語亦如之不免  
懸注大槩藥物攻治太峻則益侵脾過補則愈妨食噉  
唯在去思去煩去憂去恚而已黃蘗趙州俱有對症藥  
要在自得之龍華山寺便是老丈異時白業堂亦號綠  
野鍍金佛作栴檀觀亦得作丹霞燒亦得知美醜唯心  
則去捨無戀矣太華山賦瑰麗之極豈貞玄嶽所能唐  
突去人急不及題後俟有北役便馳上或當更在先也



今歲龍蛇殆甚此間陰司馬卒魏公卒蜀中張司馬卒  
蓋皆小於貞一兩年不特亡弟有閔希言者頃刻坐脫  
羅近溪者談笑而去則皆老宿也然迸於一時可歎可  
歎付之無可柰何而已薄意將侑不一

李本寧參政

山中無復世緣雖故人時時夢寐而關途阻修何由一  
通訊問乃飛鴻宛然尺素係之別楮數百字皆肝膈語  
且被我以復陶食我以紅鹽口體之間無非雅贍菰蘆

中頗爾神王矣關中學使京口無兩此其才卑卑滿百  
何敢望一于鱗第其覽識中窾汲引功深于鱗高簡龍  
門自擬物情軒輊故不盡誣也以公秀傑之才小斟酌  
其間便足光掩疇昔僕比待罪隣壤因得竊窺秦風之  
雄但於時業稍覺粗曠又乏師友淵源公欲取江左清  
華之氣叅之甚善甚善家弟齋捧還力欲乞休尼之不  
可今已杜門玉山道中第聞兩臺意不合或未能賦遂  
初耳助甫磊砢有氣甫別我向玉門關覺領燕突突除

目乃馮君任當是以才舉且新宰公郎署交也宦行達  
矣知太公時少違然以尊甫日左右之蘭玉森繞夷猶  
其間何恙不已嫂近遷長安計亦日勝容廼公健在佳  
兒時至自來母為助長也僕於九月舉一孫杯勺益自  
迫焚香烹茗展法書名畫信步花竹間調赤白鸚鵡俯  
碧瀾施食朱魚甚適間為責文進人暫苦如博士弟子  
完日課此外皆夜郎王國也公欲援助甫例索四律貧  
不能當咸陽繇僅以其半書扇頭供一咲不具

又

鑿坏之人與世路隔絕初不知王父朝議公計缺焉生  
舅方懼無以白於尊甫方伯公而執事惠然數千里之  
書劑以數萬里之物宜玄奘甫自五峰入耶何梵夾之  
饒瑰奇也秦中學政械撲則楊應寧翹然耳仲默于鱗  
差能以古文誼振之而執事遂雙舉其肘墨書褒然謂  
且入陪九列而尚少徐之豈玉堂諸公不能不介介青  
紫耶然天中紫微省毋妨吐氣耳舍弟遂獲步武寧非

至幸渠以前䟽故意微齟齬知執事省覲情篤當為促  
之貞老矣不意天假之靈得懺一切宿業賣身作道家  
奴足以沒齒彼白簡中楊王二三君子且擬以一瓣香  
謝之執事何自用于鱗寬不肖不肖每及于鱗至於今  
愀然神傷也承示欲有效於朝議公貞之托肺腑者兩  
世矣其何敢辭十月入關與杯盂筆研緣絕杯盂之貺  
敢返諸來伴而請受筆研後第碑志已得人不知何所  
任之冬寒北地尤劇加飡自愛

又

秋初貴鄉人有携尊公尺牘先容者蓋五載前筆耳為  
泣然久之而以閉關故不能盡副其意却附一札報公  
一薌一縑薦尊公凡不知其無浮沉否也地下之托即  
以賢橋梓肺腑所素照且不忍以不文辭而況重之諸  
公子無已之孝思乎哉弟所虞者楚材如鄧林人操楫  
管而隧上下石俱以屬人口中物如愚昆季則不能無  
正德時康李隙耳念欲返使者而使者堅其請謂且迫

堊強浣故研從人乞殘筆墨而了此終恐不能無負至  
意也所貺雙杯盂緣從梵網本又斷酒以故輒附壁敬  
拜三絕之辱薌帛將遠意長鬚碌碌樵汲無可使者亮  
而置之不一不一

又

前者不腆之文不足以為尊公地下重而遂勞災石盖  
至今有餘媿焉屈指尊服已公除暫為大方作一福星  
不旋踵而入佐廟謨定國是使吾曹長保丘壑深所望

也僕之踪跡見若似微有得者而不知其空空如也草衣木食鰥居匏繫聊以懺宿讐汰沈濁而已家第能謝浙紱差足暢茲葉山人茂長便附此山人長詩歌饒意氣三千里慕公上謁不敢望孟雲卿之於昌黎公必不至作劉义也初夏未暄為道自愛

又

水行三千里去家七週月而訪我弇中僅八日而別別時亦不覺異別後忽忽如失且桂魄轉瑩令人益思叔



度奔中山池不能百畝昨秋得汪伯玉張肖甫胡元瑞  
春時得吳明卿最後得足下與來不疑而汪仲淹凡兩  
與馬僕所以報山靈者亦不薄獨諸賢尚默默金玉爾  
音以此世界小缺陷耳見屬一序二七言律於寢溲處  
覓之及寫九襲帝四清江帝十羅文帝指節盡痛而無  
益於足下徒疥壁而已日苦酒食徵逐復有官中事一  
過重九則有被髮入山不復能顧妻子足下青年鼎貴  
天縱以才出則衣被一世處則暎帶千古綽有餘地第

羊腸詰曲猓口猓牙埋光鏟鐸以竦蒙氣之豁可也蚌  
珠勿剖時至自吐公家猶龍公亦不廢子孫唯戒臨敵  
輕喪吾寶敢以此薦足下勉旃加飡自愛

又

夏秋以來久不見老丈除目意疑之謂當事者即不解  
好真龍何以不至都下遇一楚客云已丁內艱矣既不  
能得其詳而村僕又無可使者遂缺絮酒脯修之敬而  
賢仲氏至則以老丈之大教隆幣來始知所丁者生母

匡夫人也讀行狀將數千萬言其文筆古勁敘致詳委  
毋論已老丈所以描寫匡夫人之才行與有功於李氏  
者抑何偉也非有仁人孝子之心如吾丈不能發非有  
檀左司馬之筆如吾丈不能就僕真是受成而已特以  
體不能太詳不免有所裁損有負至意如何如先君子  
歿八年而始復官又二十年而始有贈有祭有塋噫亦  
艱矣僕始可藉手而見地下矣第留樞一補大是蛇足  
頭童齒豁豈堪塗抹而與諸少年游且病弟雖小間尚

在醫藥病婦呻吟牀褥寧能忍然業上書乞骸矣不知  
當軸者可容鏡湖一曲否叔季二君幸為我致聲聞王  
太僕先生尚健飯真大奇事其以登第之年生者僅恃  
粥耳粗薌綾帛筒布附薦几筵不一

又

賢仲氏孝廉歸有小啟及太君誌草寄上想已達矣僕  
乞骸之疏既不得請而諸君子頗見挽以先君子甫被  
上恩誼不容負且留事稀簡稍可藏拙勉而北至京

口繇龍潭宿攝山探明徵君之遺趾則愧生讀江總持  
之遺編則厭發幾欲轉轂南向次且不果人事小間獨  
處一室念病弟身在醫藥尚多進退老妻篤困牀第了  
無起色而諸老之乞休者俱復報聞無筴可尋遂初真  
所謂六州四十三縣鐵不能鑄此錯也足下比哀思當  
小紓不朽之業已成勉思太上之立以酌造物每遇相  
知念足下材高骭體謂公除之後宜即出以撫世酌物  
第覺得文苑一段蒙氣悒鬱不散無論吳明卿不復振

即汪伯玉僅得一薦剡而復報罷僕之鷄肋故非盡繇  
子墨客卿也若足下能如佛圖澄海鷗朝賢則無所不  
可少泉公乃孫人便聊此附候起居不一

又

前月得手教傾挹之深且具悉苦塊近况恍如面覲  
縑不敢遽裁量篋而藏之以俟改服兩玉卮啟櫝爛然  
溫然適兩兒就試至此傳飲竟夕不忍釋手其人如玉  
詩言故不誣哉金陵名勝足可娛目曹務簡省不妨吟


嘯特以夏來饑饉狼籍使人無可着足處閏月十九日  
得亡弟計遂別作一魔境界區區長於逝者十歲焉能  
久存即不死亦何心在世旦夕唯有乞歸耳痛此子甚  
彊特以閩中冒暑驅馳窮夕披閱釀此奇症病中猶能  
有所著述以自攄見大怖將至恬然坐脫兄聞之固不  
能忘情於人琴亦當有所印證於來去也近料理其詩  
得十五卷付梓將竟文令從子輩錄出續梓之必期玄  
晏先生一序以附不朽當更有專請也仲君事知已無

他兄友于之篤士林所羨即有信北上當為太原公致  
兄謝意似傳彼中月旦於仲君微有賴水之謠倘可風  
之改玉改行亦何難也少宗伯於兄厚矣偶及誹調一  
端云玉堂故侶尚有不能平者此亦何足深念男兒墮  
地便自有命如伯玉諸賢竟爾杳然不能使後世無憾  
於右文之朝耳賢妹丈於極冗中一接不及少盡甚歎  
外有薄

闕

念四絕句附覽不一





弁州續稿卷一百九十五

欽定四庫全書

集部

弇州續稿卷一百九十六至

詳校官編修

臣

潘庭筠

侍讀臣孫球覆勘

總校官進士

臣

楊懋珩

校對官檢討

臣

王鍾健

謄錄監生

臣

王心仁

欽定四庫全書

弇州續稿卷一百九十六

明 王世貞 撰

文部

書牘

答顧益卿中丞

弟十五年前所交游多文學氣誼磊落不恆之士入靖  
來耳目無所關涉強起之南都所交游則多老成名德

長者其愛我知我前後亦如是晚而得吾兄蓋兼之矣  
前覽諸疏其所規畫注措瞭然指掌文辭既訖而復古  
雅然弟所深服者不居功不急效有古士會父子之風  
與趙營平經遠之畧不似今之逐逐功名之會者而已  
也以故於大疏序擬少攄其區區而南中正值多事匆  
匆拈出讀之殆如夢語適有袁魯望學憲之長壻張太  
學奉訪聊附之以上而使者復至矣損俸以供故人酒  
又益之以珍貂名藥而亡弟處又拜厚奠尊兄於故人

之誼若此第何以為報耶弟乞歸不遂荏苒滿考抵淮而拜新命遂以間歸里既免驅馳褫職之苦而不廢贈蔭應得之典於私計誠便第撫亡者殯宮與孤嫠相嚮慟哭歸對病婦視弱兒憂旱憫灾無一開眉處七月連得雨吾州十可救五六他邑則不能一二收矣來春餓莩恐不減戊子潢池之變勢所必至今外憂未已而根本之慮又有不可言者南九卿再䟽頗懇切皆弟所屬草揔束之高閣矣太原公屈為諫臣以走為上策而不

果廊廟之上智力俱困如何弟於讞審事不免於八月抵任至正月必乞骸矣嘗與太原公書謂幾之一字有在國者有在身者國之幾兄能先之而弟輩所不能身之幾弟輩能先之而兄不能也兄以為然否承甫不成行於鈴閣小寂寞然遂成山人高節子念貧甚得兄憐之便是雪中炭也方為里舍兒腰領所苦卒卒作報殊不悉伏祈照亮

吳大司馬

翁之高才雅望其在貞之耳者餘三十年而翁之知有  
貞當亦如之自翁之見命受伯母太夫人墓中之役而  
始辱稱文字交用是貞數薦其敝帚而翁之所以褒擢  
貺錫之者不啻百朋之益今者復受命伯父御史大夫  
公隧表之役其於感恩徇知之情未能抒其萬一而翁  
過自摧謝輕輿見過歎曲綢繆使人情事欲絕貞之此  
行可以小緩執爵都門候䟽太傅之車塵乃為虛辭所  
惑狼狽治裝翁破其靜攝贍餞稠緝導送勤復何翁之

厚而貞之薄也瀕行見翁神采清澈映帶我輩追悔前  
日不能為國留賢而翁政府密書謬見推借謂可自代  
則貞又當追恨十指當斫取譏吾鄉衮不小也江風為  
崇進寸退尺忽忽勉成一序付之曹郎不知可小重翁  
行李否蘆夾竟日無一往來人尚未知翁成命及代者  
何公却似夢中囁語翹首鍾雲無任惆悵不一

莊中丞

不佞貞之獲附驥於嘉禾也蓋廿載於茲矣中間雖一



奉德音而麋鹿之踪多寄岩壑更不獲親炙有道之容而消其鄙吝唯時時於交游中竊聆風猷而談政術有嚮慕而已昨歲承有杖鉞江右之報為彼地士民稱慶未幾而尋預北司冠之推則廟廊之上固虛席而待門下恐匡山左蠡之間不能長有德星也賢器駿發高第豚兒過時之人獲步後塵復續修道家之契幸也辱不賜鄙而遠使致大教將以如天之貺且弘垂獎飾何以當之適以考滿事為南牀所擢蓋貞以例問而銓部以

例許乃敢成行俱非敢欺罔也方杜門待罪忽忽中不克覩縷薄有小效唯高明亮存之不宣

荅徐大宗伯

弟以十二日抵淮而得叨忝之報又三日而得刻報即以次日走一介投咨結於銓部而艤首南矣取廿三日到家謁先祠哭亡弟以次與邦君大夫師門姻戚酌酢甫定即擬買舟玉峯練川之間冀領清誨因小報婁江之餞而河魚見妬委頓三日甫有起色而使奉如天

之貺至矣教辭累幅所以為弟慰喜者津津不啻自口  
出而三難之說弟初亦不覺之今恍然若有悟者弟以  
不才而位遇差踰先人又踰吳中前哲則慙然懼且腆  
然愧矣吳文定邊廷實顧華玉三君子者弟尚不敢望  
下風今乃令當之翁豈飾畫無益唐突西子者蓋愛而  
忘其醜故耳獨一時之邁真於私計良便盖此遷稍先  
十日則遂廢考滿之典稍後十日不免行役之勞且未  
能便望里門一邱其私果何如其幸也癸卯師門弟齒

最少八座最晚而秩稍卑白香山有云越國山川吞碧海杭州城閣入青天吳興卑小君休厭為是蓬萊最後仙其弟之謂耶大貺出自長者不敢以例辭姑勉拜嘉四日後當敬造門下不唯欲會叔達子柔所謂紫雲者併擬請見之試刺史腸何如耳諸侯面悉不贊

山陰王相公

曩甲申之冬相公與太原相公同日大拜母論遠近加額有君實晦叔並命之謠而世貞時方伏巖穴僅與羣

蠕共仰而已不敢以賤姓名自通而邇者白麻再下鄭公起復朝野之懽有加則世貞廁丞郎之後僅從寮長聯銜薦狀於戟門之外又微聞將命者有他不知其能徹電覽否也踈庸之跡屢起屢蹟晚癖歸嬾與世味益左濫竽尸祿日切歸計不意荏苒滿考行時別吳司馬於病中出相公報札乃知司馬以留務謬薦及不肖而相公亦過許之蓋別之未幾而秋官之命下矣司馬計沾沾自喜第當之者慚汗不自禁耳世貞固未嘗得奉

下風而仰清塵將無相公方厪吐握之懷故采及於葑  
菲之賤邪分當竭蹶北首展謁堂下一傾其肺腑而問  
之識者皆云既有新命例不當入都門坐是中止而敢  
以不文之啟上瀆今財賦之地連遘堯湯之變盡為甌  
脫公私俱困人鬼未分朝野橫議蠡起蝟發堂上奇兵  
不在小人而在君子惟相公與三四大老當必有大作  
用大幹旋其間顧非賤愚所能與知也鄙俚無識干冒  
尊嚴不勝皇悚

趙汝師

僕以得北咨晚倉皇治裝又坐亢旱毒暑不敢有所過  
從而獨謁公輒辱留欸至醉飽行時一切不敢赴餞而  
公獨盛供張使玉陽公主之而身避抗席無論居平道  
義之愛其一時所以隆施於不肖者何如也初傳陸司  
寇代震涯太宰而僕代之未敢信行至淮報者至果然  
矣更三日乃使材官齎南銓部咨結以往即轉艦首南  
矣哀遲嬾散之人得與諸賢並升而又不廢所得恩命

且以其間歸哭亡弟撫病妻焚昨歲所領先大司馬誥  
黃於墓真倖事也念即欲乞身恐涉負恩非臣子之節  
故勉擬秋季履任完大猷三月作歸計矣館選已定玉  
堂諸賢適有遷轉成均之說灼然不錯願公暫一赴之  
仕止久速泯於無跡此吾夫子大段作用也山鬼伎倆  
有盡老僧不見不聞無盡左右前後伎倆太原公不能  
以不見不聞處之却以獻於公如何兒子無復得預選  
理然不得更自有味公意想同之不一



王春陵

世貞久玷一壑於世無所比數濫竽留省日抱歸悰以  
故於我翁左右僅以公事一再通咫尺之書而邇者叨  
冒除書方懼非任而翁儼然以大教先之謙光下臨責  
飾逾分豈貞薄劣所敢仰承伏諗台履萬福威德遠播  
四夷賓服八荒偃然惟是究豫以南江表中外赤地千  
里民無半菽今雖賴聖恩隆沛可以稍起溝瀆而荏苒  
之警恐將來未已唯翁一留意焉撫填之寄則汝南張

助甫襄垣郭致中其人也今雖起而未用此不可緩也  
役便聊爾附謝輒申區區伏惟鑒存不宣

馮侍讀

世貞向者辱令先季祖少洲公道誼之愛已待罪青社  
則承令先叔祖冶泉公文字之契蓋三十餘年矣嗣後  
則竊聞尊父老先生風猷政術表著一時至門下而遂  
晉讀秘書入侍講幄簪筆法從冠冕詞林如邇者楚棘  
程義雖僅吐一斑遂爾踔絕今古吾家文恪文成非所

敢望也世貞少而不敏亦竊希慕觚管之業而實無所  
成就垂盡之年不意復覩名世之作者尋又聞考績恩  
綸正當門下如椽之筆不勝踴躍私幸念貞行能下中  
官蹟低薄荆妻庸庸閭閻孱婦俱無可稱紀若先公之  
盡瘁王室南征北討孤忠勁節功大不賞易世之後始  
見褒旌贈官祭葬今已粗備詳具所上志傳行狀中唯  
是先母郁恭人裔出名家端麗婉孌事先君以慎待二  
孤以義家難二載籲天請代後死十年克終不懈於古

彤史差不覩顏門下幸譽而詳著之則我二先人地下  
之光子孫世世之感也不腆粗幣愧不成享唯冀亮存  
萬荷

葛檢討

不佞貞以甲戌春獲瞻先太保端肅公於朝列尋竊從  
長公龍池先生於回寺俱沐杯勺殷勤之懽蓋至於今  
耿耿焉壬午之秋門下裒然領解東省明年遂登鼎甲  
讀中秘書晉領史局於端肅公蓋有光焉而兒子騏亦

竊玷南省蹉跎落幾復不偶不意得預公車之席而  
門下實司藻鑑焉韓退之以不出大賢之門下為懼騏  
可以無懼矣惟學術不加益志行不加立以負大賢之  
知則懼滋甚耳唯門下誨而勗之乃所望也世貞衰老  
無狀久廢田野誤中物色竽濫留樞今又謬叨恩寄日  
抱小草之愧唯懷賢狗知一念有不能自己者敢因役  
便布其區區伏惟炤存萬懇

沈純甫

貞辱老丈肝膽之契前後見於尺牘者非一而至靖廬  
促膝澹園夜飲數舊論心不過一二昔耳然與家弟僅  
三人今其一已為異物矣人間世缺陷可歎可歎自我  
老丈賜環之後為除目所急遂正九列然高才直節不  
能俯仰時趣與政地少齟齬奉身而歸天下高之且謂  
太翁太夫人俱大耋無恙老丈得日視甘旨寧以三公  
易介惟是節聞翩然有蓬萊之游生事葬祭了無所憾  
二尊人真福德人老丈真孝子也貞老矣偶後家弟死

然去死亦無幾強顏而出強顏而食祿今又強顏而遷  
計惟有一歸耳天不悔禍根本之地水則白波際天旱  
則赤地千里周餘之黎靡有孑遺老丈讀禮之餘寧能  
愀然不置念耶用行舍藏固孔氏家法然終不以蜚鳥  
之視而忘擊磬之心也如何冗極不能躬造几筵短些  
生芻聊寄仰止唯亮存之

又

前者匆匆成一些奉奏先翁靈几得報書誦所惠志狀

者而後愧蕪辭之未能悉也執事儼然在衰經中猶不  
忘勤存故人而顓使遠來惠之以德音申之以雅貺盖  
悅焉若復奉顏色於澹圃中然益痛家玉樹之摧折而  
歎歎不能禁也老丈念及此更益其黯然矣世貞老矣  
今以行役之便得治其私所以未敢乞骸骨者非其地  
也月末強之任苟完大讞歲懇上書歸里度老丈未即  
禪除尚當呼舫艫徑造通德里門結一浮家汎宅緣第  
恐老丈蒼生之望與猿鶴相妬耳天下事尚可為若夔



龍巢許之地無分蜀洛則宗社之幸也見委黃庭俞張  
二跋敢不如命第不能逃愧於續貂耳冗次不一

許孟仲京兆

自公之別垂一載矣忽忽如有所失每念清苔菰蘆何  
異潁水門下方侍太公擊鮮飲醇以窮無方之養盖  
終身欣然樂而忘天下也第今水旱頻仍公私耗竭計  
庚寅春夏之交又當如戊子矣大則潢池小則萑苻其  
兆已見非得名世之才如公者數輩分布要地以綏凋

劫而銷禍變將來不知其所終也公亦有意念之乎大學述一書及荅問數篇僕不知古今本何如第覺公提掇喚醒精神躍然得千古不傳之秘王文成是單刀直入作用為其徒說得虛幻沒巴鼻公與之雖不無小牴牾而實相發即紫陽先生亦不能不以元功見讓也秦中諸文種種有意有色而凌雲之材扛鼎之力又能稱之必傳無疑唯雜詠一卷雖佳境層出而小涉議論時露蹊逕遠則唐人之清詣近則陳王之自然要須於此

處小加留神耳僕不才然辱公之知若此豈敢辭糠粃之導俟得命以全著作見委卒業庶有以報也暑氣初蠲為道為天下自愛

張助甫

嚮有一啟附吳山人去及報使者書計當俱達記室弟以六月初報政至淮陰而有今命歸哭亡弟則羣從泣血而舉足下與明卿之些於殯宮相嚮有餘悲矣八月杪彊之金陵任決策以正上䟽乞骸而會臺臣有得罪

於其長者計銓部當必外遷謀以弟之不當報政與銓部之不當許欲媒郤而塞其竅嘖嘖煩言賴主上洞察之更著為令甲然弟意興消沮了無復餘乞骸之章苟不獲請當再三請計半殘之身旦夕為吾有矣足下凡再與開府推弟私計之寓宇之內無一寸稔地大則潢池小亦萑苻勢所必至非得才如足下者三四人鎮定之吾不知所稅駕也故人余宗漢明府過貴郡附此此君詩在貞元大歷間而人則可當五柳先生元紫芝不

直以其官配也唯足下念之餘不一

王師竹

伏審道體勝常令問日暢昨覩玉堂諸公以次遷擢殆盡而我公宿德重望乃獨歸然行且奉及矣武試事想當仰借急欲得序論策一讀以窺經濟大畧僕賴庇以六月報政至淮而拜新命既獲免襍職之勞又不廢贈錄之典中間以便歸故里治其私亦云幸矣獨歸撫亡弟殯宮對孤嫠纍纍更增一段苦悰耳不能遽割時趣

勉爾之任第國是未定國本未立吐突進李絳出水旱  
頻仍疾癘為毒前路茫茫有何可據高明必當饒定見  
定力也役便聊此奉候并言區區外亡弟行狀一帋附  
覽

李本寧

夏初見邸報內朝儀知足下已入金明候除目不得適  
以報政離金陵抵淮而有新命返鷁故里則不能時得  
邸報久之乃聞有大梁之補中州和淑八方所湊道里

適均於布宣縣官之化為易且七年前舊物似非偶然者第鳳凰池故人步武八座寧忍坐視足下折腰外服賜環之召當不遠耳僕老而不能自決遂挂世網今既叨冒此遷贈先軫後於世法若所謂榮者殊不異波浪中一漚泡耳何足論也歸後撫亡弟殯宮對嫠婦孤兒累累滿眼腸為寸折次第收拾其遺詩文梓之天下大矣念能操千古觚翰黜陟者獨公與伯玉明卿三四君子而亡弟皆得奉下風今以風猷氣誼托王元馭為誌

銘伯玉任墓碑趙汝師作傳似可無憾獨所恃以不朽者其遺詩文詩文之所賴以廣而久者足下與明卿耳彼玄晏之序三都何能唐突不腆之幣敢塵記室伏惟鑒納為懇

李使君養愚

昨因一材官候學院者不得消息資盡告歸為作數行計已徹台覽矣吾郡魚腹之餘賴門下加意撫綏蠲其繁苛而賜之樽節二麥亦遂有秋可以少廻菜色不意



天未悔禍兩月之間旱魃為虐播種之地若焚若赭聞  
門下為民請命之誠至厯且篤此間三事庶尹憂惶亦  
如之而了不之應今計窮矣即旦夕獲澍無及矣計惟  
有亟飛報旱之章然後按實續奏庶幾當事者不以後  
時齟齬然行之者兩臺而主之者實門下也震崖定宇  
華松諸公實同此懇而貞敢先焉惟亮而采之幸甚

陳都諫

嚮者以岩穴之踪樗朽之材辱匠石見采俾得備明堂

搏櫪之一用蓋私心感之而不敢以言報也丁亥之冬  
僅一相聞竟末由躬造門下請教旋聞晉擢天垣陪與  
機政大䟽之在邸報者徃徃寓正直於忠厚先體要而  
後操切私心儀之竊意承滿考至都得一望見顏色欲  
有所攄吐而今者叨新命歸候旨於留京之近地忽忽  
如有所失方今三公九卿秉羔羊之操諫官極骨鯁之  
選慶厯聖德此其時矣然而國本未立也國是未定也  
國天未安也此三者必明公所深留意而不佞之所拭

目以俟者也人役發匆匆未竟諸容嗣布不宣

袁都事

僕以前月廿二日入叩尊公高齋握手劇語而出第覺其膚色稍萎黃肌體亦漸削以後連得兩書伸弇園虎丘之約辭旨道爽書法蒼勁曾未何時而訃音至矣天乎痛哉僕不覺哭失聲惘惘忽忽累日夜即擬奔馳修生芻之敬而病脾病目方以身付醫藥不能出門僅一效薄賻於伯子計兄此時已在苦次矣聞尊公所感微

恙無所苦頃即奄然真人之去留固無碍也名德位祿  
幾無所憾惟以百年為期尚未滿願耳聞兩臺已上請  
卹之章固宜爾也諡法當得清簡或端簡之義正直無  
邪一德不懈於尊公稱也馳奠之期在中秋後先此奉  
聞不一

穆少春

前者劉侍御以令先太公之狀來問墓表於弟茲時忽  
忽為亡弟含辛勉爾塞白并有不腆鄉帛就托劉君奉

寄後得石東老書知已達矣而未奉尊兄一帑將無弟  
文不足以為九京重耶惶愧惶愧尊兄孝思純篤談禮  
之暇他念不雜必有著述之大者以垂後若東老榮位  
隆崇委寄專篤而能持之以勤守之以默且遂舉雄真  
足慰吾曹屬望僕老矣再䟽乞歸而不獲請兩具謹言  
草而不見庸兒子之倖薦不足以解亡弟之至痛如何  
如何已飾容棺之墟於先君子側得請之後即消搖俟  
期而已適汪山人沂去附此此老七十九而遊不已詩

思亦不衰云與尊兄有故契貪一相聞弟不知其能達  
遲鴻臺否也外二刻專為亡弟者附覽不一

弇州續稿卷一百九十六

欽定四庫全書

弇州續稿卷一百九十七

明 王世貞 撰

文部

書牘

申相公

本部材官回蒙台教慰存因及肘腋表裏之奸祛除不易而相公之苦心妙用不佞雖在遠外亦竊窺一二矣

區區情事荼苦精神衰耗故急欲歸守先人之壠治亡  
弟之葬飾巾以待旦夕非有虛假惟尊慈亮之不使小  
疏成一虛套則大賜也邇者朝事甫定而後進不經事  
人遽以不根無涉之事竊其影響異有動搖主上聖明  
隆眷亡毫髮之疑而大疏所謂令女捐館壻尋別娶且  
天下之愛壻豈有勝於子者子既不令入試於壻寧有  
黃緣此數語可剖示天下萬世人乃者覆試之後甫竣  
而狂口又復嘵嘵致觸天怒方快物情第追究唆使不



免又成洶洶計相公與荆老必當申救自今以後願相公一志任宗社蒼生之重事固有什百於此者么麼妄語何足介懷安慶賊本不多而頗有驍黠者官軍以烏合不練之衆而挑之始則安慶輕敵死一指揮一千戶既而黃州復輕敵傷一守備執去一州倖又既而安慶之故將黃甲軍亦見刼凡三敗矣一故叅將徃撫之為所留三鎮之撫臣號令不齊將庸兵弱釀成賊勢如更不已勢必調楚順靖一宣慰浙江一營兵就近如吳司

馬者暫出督之庶可蕩平雖然至此則所損不淺淺矣  
吳司馬所條請貞雖與聞而不敢勸沮蓋司馬初至見  
三營之卒弱而驕不堪使又以損軍之令重卒有不虞  
不敢使之出敵故為挑選軍舍餘丁得五百餘人別成  
一軍教練精熟尋常可以彈壓狂呶遇警可當銜鋒跳  
盪貞所慮者恐廟廊之議以為有軍不用而別起軍外  
之軍增餉外之餉或致齟齬至於旗牌之請蓋緣欲借  
以稍警驕悍之氣為緩急調遣之謀耳不知輦轂之下

可給旗牌否今叅贊之責雖重而號令不能出一城鞭朴不易施一校宜司馬之有請也唯相公裁之

又

長夏赫曦伏惟相公台候萬福世貞不肖忝從鄉曲之末時遠門牆之外而相公猥推太原公之愛而愛之又察其亡他而錄之洗瑕收瑜起骨加肉相公之當國寔在癸未之歲甲申正月即賜補京兆亡何遂有少秋官之遷又矜其情事許之休沐僅踰三載復有少夏卿之

起受命以至今月不能二暮遂超躡兩官正秋卿矣又  
憐其骭體不任磨勘特與太宰計破例而聽其報績矣  
雖使世貞之父兄為世貞謀與世貞之自為謀孰有能  
如相公之委曲不遺者也世貞以月之四日出白門十  
二日抵淮已促裝從陸而道得新命咸謂於例不必復  
進京祇將南吏部原咨具由送之吏部彼當為題請復  
職貞得以其間歸哭亡者且為先君焚黃於墓道私計  
誠便矣第此銜恩酌知一念未得陳之堂下九叩以布

區區則更有所不安耳側傳邸報主上渙發溫綸隱然  
省已尊賢至意視朝親政俱有定期此相公與二三大  
老挽回感格之功而南都一疏亦不至糜碎於雷霆之  
下知聖度天聰固不盡委之麴蘖也第江南累月不雨  
赤地千里巫尪見殛旱魃愈逞禾苗俱不及種種者及  
花豈之類又俱萎枯百無一長雖二麥頗秋可以支持  
目前無衣無食何以卒歲又況加以敲榜之刑剗其已  
枯之膏而使供繁重之賦乎縱使盡蠲其額而賑其垂

命者恐猶未免於戊子之禍也相公吳人也太原相公亦吳人也其知吳之受災為至真其欲為吳請旦夕之命為甚切但恐人主未必信左右未必喜而大司農未必能出而任之則相公之於調劑亦甚難矣雖然不敢以相公調劑之難而遂絕望於調劑也先君子之隧虛而弗克樹石者垂二十年矣嚮者以相公之曲成而賜贈脩冢又承相公之許以雄文冠之朽骨為之若肉草木為之色飛而迄今未有領也雖一日萬幾倚馬之才

亦何所難其揮洒哉為此專令豚兒代領伏冀垂賜并有薄效以志區區不宣

又

昨以九卿會䟽去役之便敢附布區區計已取進止矣世貞賴相公大庇已於廿七日履任緣郵繻艱請不便於役者故俟會審䟽便與謝恩䟽同發遲緩之咎不能辭也世貞少習城旦家言老而不盡忘拮据刀筆或可苟免大戾惟見兩臺之長與屬僚爭論紛紜不已山人

鳴冤蓋失志求進之徒其操術甚竒其措心甚險不免  
大費相公苦心而衰劣過時之人惟有逡巡作骸骨計  
耳許相公凡三為汪伯玉司馬作書而最後云敝郡稱  
才獨一汪司馬嘗執鞭弭從諸公之後似亦頗承許可  
附於知交今服闋久矣豎儒言輕不能推轂使坐老丘  
園心甚惋惜倘得假一言之重於當事者當事者誠因  
重明公以重汪司馬則區區之說易入也伏惟留神其  
辭甚迫切豈以南都散曹返能加於揆地耶不過以世



貞辱相公及太原相公太宰公知己之過謂可以進言耳不佞與伯玉交知不能逃相公神鑒然茲事何敢預也先司馬賴相公大恩得葺理墓田丙舍唯是七尺之石壟於隧道久矣而相公至今尚靳一言誠知一日萬幾然以倚馬之才不過費半夕晷耳貞已衰老倘不能待是無以藉手地下也誠審䟽上緣熟審者過多今僅得一人耳聞中宮將有大慶不知可免行事否餘不敢贅

又

邇者世貞以乞休之疏奉瀆清燕蓋衰暮之年薄劣無  
狀自當歸骨故里而邇來言路諸君貴少賤老吹毛求  
疵無所不至南都踈逖供其食噉而被論者如屠羊之  
在肆噤無一聲何顏可以在列何心可以供事今者即  
不見允明春自當引疾唯冀憐而捨之聞台璫能自損  
抑上眷亦不至甚人情稍定衆嚮稍一但中宮已及大  
暮未見的確中外謂上令秘之恐未有此理而南中臺

省已請冊立九卿復將繼之無乃太蚤乎楊司馬差能  
持重不然走未見其可也蒙許以先子神道碑歲底可  
完不勝踴躍謹錄後沐恩典贈官祭葬緣由并子女之  
詳呈覽倘即揮賜貞當躬奉以歸樹之先壟子子孫孫  
感德無極不勝懇切俟命之至

申許二相公

前者齎謝恩及會審疏人便一通賤名於記室計已徹  
覽矣貞不才奉職無狀以報政一事見齟臺臣而傍牽

舊談橫加汙蔑分合席藁以俟嚴譴但貞前者因查有  
前例而後任之事與所支之俸為兵部侍郎故當以陞  
任論與調官者不同故具咨銓部銓部益以後例過垂  
飾獎俾亟奉行其後叨忝新命以南部咨結送銓部銓  
部據而題給贈蔭非貞所敢擅專亦未嘗有毫髮欺罔  
也計旬日來已奉明旨處分或斥或削已定但區區生  
平心跡不能自白敢具疏以辨萬一見留更希大恩放  
歸免滋多口幸甚幸甚或云有所受之或云別有所為

貞俱不敢言第一歸在念倘得奉相公大篇刻石先隴  
死有餘榮矣餘情具䟽揭中茲不敢贅

又

謹啟世貞行實不孚邊幅鮮素以致見憎讒口仰仗聖  
主之明與相公委曲維持調解得無麗於丹書乞休小  
䟽又辱勉留貞苟非木石寧不思洗滌心志鞭策駕鈍  
以少酌恩造第於出處之疚心與宦曹之觸目一經拈  
出慚悔無地語云畏首畏尾身其餘幾顧影而歎不肖

之身所餘且盡矣况前路幾可餘日可數若仍冒昧隱忍  
叢積毀忌更來指摘縱相公憐而欲全之晚矣再疏陳  
情非敢毫髮欺隱惟冀俯念特賜允俞瓦全此身乃相  
公終始之大德也先人不朽日夜在心并祈留意萬感  
許相公

謹啟貞以巖穴長物老不適用虛名見采濫竽留樞自  
揣衰庸恐貽敗羣之誚頗安寂寞不作觸藩之想婁疏  
乞骸異全晚節而屢屢溫慰未尋遂初前後二祿荏苒

三歲第滿百擿茫無寸補既辱我相公破例許之赴部  
行至淮陰忽得邸報則驟脫丞郎之列而遽隨令僕之  
後驚喜過望慚惶繼之此固我相公求舊之至仁與憐  
才之高誼然使予者不傷明受者不色恥則非貞所敢  
當也且巖穴之下慚先登於伯玉休窠之間愧後塵於  
定之進退維谷展轉負刺邇雖苦暑疾尚擬竭蹶登陸  
叩稽堂下以展惓惓一念第詢之長宿皆云既奉新命  
不當入京且大猷在九月中而秋省遂無一長官恐於

事體有碍不免側伏金陵傍邑得旨而後履任伏惟高明垂鑒東南之旱赤地千里禾不及播綿不成莖此禍比之丁亥殆甚即使聖恩蠲免賜之餘生無衣無食何以卒歲興言及此腸為寸折相公社稷蒼生之繫衷久矣幸不惜一投手舉足之勞為此周餘之黎解倒懸之苦下情無任懇切之至

又

邇者以咫尺之啟申候興居兼識感忱附布不腆過承



獎飾推以如天之貺慚皇跼蹐莫知所當世貞仰竊台  
庇自淮返艦便道過里得治其私旋用讞審期迫星言  
俶途已於前月廿七日履任矣貞少習城旦家言復親  
刀筆之役竊謂可藉手苟免咎戾但蒲柳易零樗櫟無  
用恐終負門牆知己大恩耳茲諗六載考績絲綸渙頒  
晉秩宮師復冠天省錄後賜金流光揆席凡在朝紳靡  
不加額稱慶而况受知之深如不佞貞者其為欣忭何  
可言喻敢具一啟少伸下私唯是先人辛勤一生南北

御園忠而獲罪雖荷上恩昭雪所恃以不朽者獨賴相  
公片言華袞耳既蒙賜允唯得早惠托之堅珉此則貞  
之所日夜鏤心者也所示汪司馬伯玉已敬達之元老  
及太宰矣相公之命不敢不將鉅寮出處豈遠臣所敢  
預聞也審決䟽上聞中宮將有大慶不知可無行否餘  
不敢贅

楊太宰

前月之廿八日得貴部回咨洗其既往加以隆褒破例

賜容得從考績已屬逾涯之幸而豚兒騏復致尊旨謂  
且將有後命實出意外即於滿日過部又二日離京行  
至淮陰而司寇之報至矣世貞么麼下士潦倒陳人科  
第雖似小深資望實為甚淺不意遽躡羣寮之上超從  
八座之列自唯曩者避言里居無復世念翁拔自遯野  
畀以留京曾未匝月晉佐司寇非常之格施於遷人衆  
所駭羨先君子雖獲昭雪而天澤不究尋見壅沮大宗  
伯過採臺議獲沾葬祭尚復嘆惜一官而翁朝得小疏

夕為題覆使冢中之骨獲被常伯之榮世貞今官僅南  
卿佐耳竊祿未久而遽有此擢且又少延月日俾得遂  
家門之私翁之盛德譬若大造之於物無不蒙其生成  
而於造物之中有獨厚生而曲成者則不肖貞之所獨  
私也旦夕擬叩都門瞻天之後即造堂下九頃以致感  
激之誠然後小獻芻蕘庶抒葵藿而問之舊宿皆云既  
有新命不宜入京且九月當大審而部無一人在者於  
事體未安以故冒昧輒齎南天部原咨并上而身返真

州或以間一視仲氏殯所焚黃先人之壠終始皆思造也下情無任銘刻尚容專布不宣

又

前者齋公移官役去有不腆之啟少致感忱今豚兒上之未奉教荅尋有兵部官役回則貴部所覆贈先錄後二咨俱已到矣我翁生成造就之恩非復常言常辭可以罄述世貞自淮陰聞命以便道得歸掃丘壟少致手足之戚尋以會審期迫束裝就途前月廿七日已履任

矣蕭規之後或可苟免罪愆第未老而衰種種相現加以國是未一伏機漸露若隱忍尸祿恐終負門下知遇耳我翁國之著蔡狂瀾藉以砥柱善類藉以赤幟者也與一二大老似不可言去歲荒民貧崔符未已必須得才撫臣若張九一郭思極者料理之其次許孚遠可用也又其次倪凍可用也是四人者皆不能滿於物情然緩急之際在採其所長不必較其所短也新都相公為汪司馬三致辭於不佞矣最後所云敝郡稱才獨一汪

司馬嘗執鞭弭從諸公之後似亦頗承許可附於知交  
今服闋久矣豎儒言輕不能推轂使坐老丘園心甚惋  
惜倘得假一言之重於當事者當事者誠因重明公以  
重汪司馬則區區之說易入也伏惟留神豈謂不佞踈  
逖散曹能預大臣之出處意者謂不佞辱翁與二大老  
之知欲令抒其鬱鬱耳不佞不敢不以聞終不敢預也  
別楮聊將積忱仰祈鑒亮

又

旬日前上到任疏人去有小啟奉布區區計已徹覽矣  
不意到任之時黃侍御之疏已發既奉旨下貴部想已  
處分不當復贅但貞嚮者申明後任係陞官之俸薦起  
非聽調之人於例似不相合故具咨以請然不敢擅自  
行止而辱老先生猥加飾獎謂原有無玷公評不拘此  
例之說回咨既到方敢治行又辱老先生體念覆給誥  
蔭子於蔭子疏內明開曾經被劾緣由未嘗有所隱諱  
也世貞盛年時不自檢飭口吻之間多生荆棘筆札之



際或樹戈矛以來憎毀致成口實雖晚途岩穴稍知慎  
默言路借之猶得譸張為幻含沙射影第以貞為欺罔  
雖則不情然物忌多取叨忝過分猶所甘心乃至波及  
長者以寬厚公平之政而誣以扶同黨庇之誚至於司  
屬寧有他弊而欲勒之同斥貞雖有胸無心其負芒刺  
何可言喻此子方挾言路之勢兩犯臺長欲廢憲規於  
貞何有第年來頗相見暱行時追致贐幣索詩為其父  
母忽反目甚口若此中間所謂習幻化被黃冠者數年

矣貪心難斷覩顏復出此語傍譏了無忌憚又謂氣力  
足以搖撼該部亦似別有所指蓋自斥闖復進山人鳴  
冤之說行而物情大變矣魑魅魍魎閃倏於青天白日  
之下攫市於通都大邑之中貞雖苟免不去後禍未已  
倘得憐憫放之歸田則老先生之終惠也下情無任皇  
悚懇迫之至

又

貞以素行不孚致來指擿乃辱我明宰公憫其非罪護

其所短兩䟽覆覈不唯九闕之浮翳一掃天聽竟迴而傳之士林知不肖之心跡尚得稱人於世者皆大造力也鄒考功之䟽可謂仰體上臣之盛心下表憐才之獨念但愧非謏劣所敢當耳比時辯明小䟽實出一時憤懣既發之後良自慙悔後得兒騏信乃知我翁為之刪削俾無樹敵又戒勿再申前請翁之曲成一物至矣盡矣第試視不肖之身豈堪復任鞭策不肖之性質豈能過為骯髒脂阿以事言路諸少年者哉況未老而衰目

肯齒落筋骨緩弱步履艱難僅有一弟化為異物從子令  
淑又復垂命情事若此焉望其復有所展布也乞休小  
疏非敢有毫髮虛固唯冀曲體俾遂生還苟存晚節不  
至為門牆之玷則終始大惠也伏覩大疏剴切忠亮賢  
於王端毅韓忠定遠矣無論繹改未見悅從此則遠臣  
之所深憂痛惜者也張滄老此推甚愜衆情第貞所始  
知者清標厚德耳既而識其盡瘁之節應變之才萬萬  
不敢望也臺老亦同此懷餘不敢贅

耿司徒

昨使者致帶補來謂不欲領區區臚耳後使至乃始啟  
封視之其光爛然即駭鷄夜明之珍恐不能遠過乃我  
翁用僑札之誼而不佞虛銜負羈之愧也傳杜君疏辭  
不敢有毫髮訾於長者尋其微指乃是欲激翁使鷄首  
必不北耳恭覩溫綸嘉予諄篤上不以恒格待翁翁乃  
可以恒格自外耶昨北省復有言及新司農矣語云雖  
無老成人尚有典刑今老成若姜若方若傅斲之幾盡

而尚復欲滅掃之是併所謂典刑者不欲一二餘也寧  
但老成而已孝宗朝三原洛陽鈞州吳興壽考者至八  
十少亦七十餘黃髮在列素絲五紵委蛇從容以予嗣  
聖而逆瑾輩頃刻而削逐之遂盡翁以為孝廟時治耶  
武廟時治耶夫使逆瑾為之天下不敢言而尚敢怒今  
以濟濟臺瑣之臣而甘心逆瑾之技倆乃不聞有怒者  
何也翁入朝幸為三老冢卿臺長一言之若但調停兩  
可不一分別天下何時而可望復孝廟耶適江北諸生

有梓翁留貞大䟽者雖以故不及上然翁緇衣之好則  
有目之人咸睹記之矣昔人云生我者父母知我者鮑  
叔僕無敬仲之材與生平之契而翁之知視鮑叔更甚  
何以為報貞雖隱忍不至有胸無心既為人拈出唯有  
一歸而已再䟽稿附請教知尚滯真州不腆肴酒以犒  
從役唯麾置之為荷

石拱辰司空

秋來伏惟道履萬福蘭玉芬茂為慰世貞叨竊大庇以

報政行抵淮而拜茲命主爵者不以貞之奉職無狀而峻陟之又為之破例以請得責及先尊慈而錄其後人所以滋培不肖者至矣念國恩未報知已難虛故勉而復之官第恐日深日負終且作乞骸計耳壽陵大功計指期可竣門下又當有非常之典今望實隆鬯純白無疵孰有如門下者藻鏡之地必當仰借第國是未一物情未安且中樞要地復有登進渠必不能安保富貴萬一侵奪外權三事以下當有一番風波狂瀾砥柱竊為



門下望之又竊為門下憂之貞近歸故里撫亡弟喪對  
孤嫠婦子纍纍展奏門下所貽些辭腸寸寸折附去行  
狀一紙可以知其槩也穆敬甫兄何以都不聞問想所  
草大公墓表不以登石矣齋䟽人便附此少布區區不  
悉

詹咫亭

昨者承教貺遠及草次奉復嗣後不獲頻修問訊緣南  
中雖稍寥簡而衰病頻仍又遘手足之戚忽忽過日想

門下必能見亮也郵書中每覩大奏於國體事幾往往  
妙中肯綮累見褒予蓋不待骨鯁之節有素也所蘊藉  
宏矣賈傳宣公何人哉唯國是未一言路縱橫日勝日  
負莫知底止而根本肘腋之地大有不可言者門下必  
有定見定力毋俟喋喋也貞以誤恩過深黽勉履任然  
刀筆之外茫無寸補恐逾久則負國逾重旦夕唯有乞  
骸歸卧而已役便聊此附候起居朔氣漸深唯為宗社  
蒼生自愛不宣

楊本庵

自貞之先君子獲從先太傅襄毅公之後塵覆盆之燭  
則自先襄毅公發之而不肖兄弟亦荷拂拭草莽以至  
今日僅於大事兩陳些辭實不能効萬一之報而自廢  
巖穴木石與居於長者遂至沈簡擢髮何以數罪唯長  
者御清塵而不肖濁水或異稍見寬耳通過故里李兵  
使以先襄毅公榮哀錄見命為序貞雖椎無文敢不藉  
手以報九京也唯是初至白下百冗蜩集稍閒則顛藉

觚管以從事矣伏惟我翁入佐元樞督治方中進秩賜金未足上酌正位八坐若陟禽之繼尹旦當在朝夕尚容專賀先此附候并布區區不宣

潘印川

昨者途次附復計已徹覽矣弟已於前月廿七日抵任卒卒人事兼有審錄發疏及竿牘之累寢溲無暇念之金陵僅三月而耳目之內風波萬狀魑魅魍魎縱橫於青天白日之間老太見山人鳴冤否乃二三渠黨所合

成毒藥欲以扶鯨而抑誠傾太原而疑吳縣不盡一網  
不已也南垣兩䟽反墮其計中南牀之論吳悟齋而波  
及二三老若處之則撥一蜂窠矣吾儕雖幸不及身寧  
復有毫髮宦味耶旦夕計有歸耳適家間小僮徃視兒  
子有小衣裝此間已具一馬牌之濟上倘老太得續與  
之大惠也病冗草次不一外亡弟志銘附覽并有薄侑  
炤納為荷

溫一齋

貞自叨佐留樞僅從郵便一通候於長者即辱教札飾  
獎逾涯榮於華袞重於璫璫矣恭諗門下晉長中臺仍  
領國儲漢之初固有以御史大夫主計者昊天降割三  
吳之民無歲蓋魚腹者一而魃妖者再矣溝瀆之餘所  
存何幾今雖聖睠南注霈澤汪濊可以小蘇目前而來  
歲之計固不知所終也嚮者覩翁寬卹之疏故尼弗克  
上而仁人之心與經世之畧已識其大幸有以終惠之  
世貞衰駑待盡一壑不自意出又不自意遷惟是國恩

未酌勉爾之任然度終無可以稱塞者旦夕唯有乞骸  
骨耳雅齋公方壯胡以竟不起殊令人短氣世途萬變  
物情洶洶門下必有定見定力不佞請得承教焉不備

李大司寇

自甲戌冬於清源一奉教貺旋有附報嗣後間者濶焉  
門下峻德宏猷師表一代貞雖闇不曉事寧無秉彛景  
行之好同於衆人特以巖穴下士於世無所比數不敢  
唐突尊嚴昨佐留樞又苦病戚相仍因循迄今門下之

記室遂不敢通一帝良切皇悚惟是門下邁德淑問遠  
肩咎繇力持巨璫剪其爪翼海內拭目以望風采今其  
人復用矣砥柱狂瀾竊為大賢望之懽踈人便聊此奉  
候興居并抒下悃伏惟鑒亮

塞司徒

不奉清問者一歲餘矣伏審台履健勝令問宣暢二尊  
人萬福為慰貞巖穴陳人掩關俟盡既不自意出又不  
自意遽中間以報政行至中途而返既獲釋車馬煩怠



之苦又不廢先後贈錄之典於私計便矣第碌碌無補  
轉負國恩中夜思之若負芒刺東南水旱之灾極矣周  
餘黎民靡有孑遺主上賜貸賜賑湛恩汪濊目前似可  
小蘇然獻歲之憂未已也三吳故翁四履之地也上以  
翁佐司徒是以翁惠吾三吳之人也惟朝夕為粟庵公  
一言之其造福不淺貞等之屬望亦不淺去後匆匆不  
克覩縷伏惟炤亮

周中丞李侍御

謹啟吾三吳之民自遘丁亥澤水之儆魚鱉其居甌脫  
其疇戊子一歲之間餓莩塞途僵屍蔽川加以役癘為  
虐餘黎之存者十不能二三至今年春賴我公祖爬搔  
宿賦而為之樽節民始有生氣二麥稍收旦夕幾一飽  
民始離菜色不意四五月間天復降割旱魃逞其克威  
以成大旱此間三事大夫京兆令長祈請靡效赤地千  
里澇池圻裂簷井竭涸禾苗不及插蒔其所餘種且盡  
稿死矣故鄉來者不絕俱云彼地之旱尤甚雖以我公

之精心為民晝夜露禱亦未響應已矣無可復望矣惟有飛章上報旱荒嗣後勘實續奏庶幾聖主沛發好生之念廟廊諸公得以拱手將來倘如丁亥故事周餘之民尚有了遺計我公祖拳拳宗社蒼生至念䟽已前發區區為桑梓請命情不容已惟冀亮原萬懇

巡撫應天周中丞

世貞賴大庇奏績至淮而有新命休沐過郡潔誠晉謁閭人見辭及婁許而庖廩之惠至矣抵家拜餽幣問存

又拜賀儀及綽楔之賁感佩不可言念欲一造戟門展謝併擬伸其區區而賤軀為勞暑積凌遂苦河魚之疾左目忽青方戢身醫藥未任舟車竊因一介以啟事上塵而附中不腆之敬自不佞發留都還敝里諸道路所經由萬口一辭以老公祖惓惓為周餘之民請命於天而不得則又請命於天之子辭旨懇惻言言肝腑聞按君繼亦有勘䟽上矣二相在事於桑梓當無所不留意者第恐更以桑梓之故見疑於上之左右及大司農跋

胡囊尾有不能盡展其作用耳所賴老公祖與按君終始力持之今所賴者公帑及巨室耳公帑如洗巨室如掃必無所取賑即賑不得法徒滋姦胥中豪之索何益之有聞太倉儲粟尚可十年計唯有省冗運之糧全灾者免次灾者折二端而已織造可暫停否金花可半減否至於邇者搶米一事非饑民也盖打行惡少耳將來必以便宜梟示首惡一二其勢立消不然未知所稅駕也郡城睥睨可憑凌而上禍在剥膚如何如何豎儒偶

有所聞不敢不以告若兵道之憂國憂民實心實政吾  
老公祖與按君相與咨詢令策而行之又一州五邑之  
守令皆廉能吏也唯曲全而加鼓舞焉幸甚中秋後勉  
之留省便道晉謁尚容嗣布不宣

弇州續稿卷一百九十七